

ITERANIBA N TE TABO N TE BETEBEKE

TE RONGORONGO MAN TE ITINGAUN N TE AONO

Mwaakan te Mare Ae Tabu Ae Akea Tokina

Iroun Unimwaane David J. Thomson

Ngke I mwakuri bwa te mitinare ae bwanin ana tai n aban Biribin, raou te aine ae e tataninga n te mweenga i Christchurch, Nu Tiran, e katekeraoa ana rekenibong n ana ka 21 n ririki. N te bootaki ae onoti aei, raoraona e anganna ana bwaintangira ae akea tokina. Kabonganakin rabakauna n te mwakuri ma te kai, e kaara te kai ni karaoia bwa te bwaoki ni mwane n aron taraan te Hamilton NZ Tembora. E ataia bwa ara kouru ae rangin ni kaan bwa ti na mare n te tembora, ma te kabane mwane n nakon te tembora e bon rangin ni bubura.

Kabonganakin te bwaoki ni mwane aei e kaikoiko Sue nakon te kouru aei. Ngke ngaira n tatabemania ti oki man banen ara mwakuri ni mitinare n te 1982, ti reitinako ni kaiko. N tokina ti a kona ni mireaki ibukin te tai ae akea tokina n te NZ Tembora. Ana bwaintangira raoraora ae moan te tikiraoi e teimatoa ni kaona neia taan mare ni mweengara. Uoua te ririki n nako, ti titirakina raoraora bwa e na karaoi tabeua riki bwaoki—teuana ibukiia natira aika a ata naba kakawakin berita aika tabu aikai bon ibukiia.

N te maungatabu ni kabuta ae e a tibwa nako, e reirei Beretitenti Boyd K Packer, “Mwiin ni kabane ana waaki ni kakukurei te Ekaretia bwa e na taraia bwa a bane ni kukurei bumwaane ao buaine ma aia ataei ni mweengaia, a kamanoaki man reirein ao tuua n te euangkerio, a kabaeaki raoi ma be-rita aika tabu n te nakoanibonga ae akea tokina.” (*Maungatabu ni Kabuta, Eberi 2012*).

Te Katanoata nakon te Utu e reireiniira bwa, “Te baire ni kakukurei mai ieta e kona n reita te utu bwa a na reitinako imwiin te mate. Otenanti aika tabu ao berita aika tabu a kona n reke n tembora aika tabu a kona n tatabemania n oki nakon te Atua ao ibukiia utu bwa a na katiteuanaki n akea tokina.” (*Katanoata nakon te Utu, 1995*).

“Nanon te reirei aei bwa te mwaane ao te aine aika a rangin n tangiriia i bon irouia, aika a uaia n rikirake rinanon kataaki, kimwareirei, nanokawaki, ao ni kukurei n tibwauan aia tai, a kona ni maiu n

ikotaki ma aia utu aika a karekea te kakabwaia anne imwiin te mate. Anne tiaki ti te mii ae korakora ae kakukurei; ma bon te koaua. (*Unimwaane Richard G. Scott Maungatabu ni Kabuta, Eberi, 1999*.)

“E katabuaki te mare iroun te Atua nakoia aomata,” (D&C 49:15) ao e karaoaki man te moan tai – e kakawaki nakon karietatakira n taai aika ana roko. E reitaki te Uea ma Atam ao Ewa n te mare are akea tokina (Karikani Bwaai 2:23,24) ao ni kabanean boong rinanon te burabeti Iotebwa Timiti, E katanoata, “ngkana e mare te mwaane ma buuna n au taeka, ae au tua, ao man te berita ae tabu ae boou ao akea tokina, ao ni kabaeaki nakoia iroun te Tamnei ae Raoiroi n te berita, iroun are e a tia ni kabiraki, ngaia are I a tia n anganna te mwaaka ao kiing n te nakoanibonga; . . . e riai ni karaoaki nakoia ni bwaai ni kabane ake e a tia au toro ni katikui iaoia, n te tai aei, ao rinanon ae akea tokina; ao a na riki bwa taanga aika matoatoa ngkana a otinako man te aonaaba; ao a na riaoaki irouia anera, ao atua, ake a mena ikekei, nakon karietatakia ao kimwareireia ni bwaai ni kabane, ae a tia ni katabuaki iaon atuia, te mimitong ae riai n riki bwa bwaninin ao reitinakon taian koraa n aki toki ao n aki totoki.” (D&C 132:19).

Berita aka tabu mai ieta n te mare a karekea te kabaeaki n te mare ae kororaoi ikai n te aonaaba aei. Ma a katauraoa te berita ibukin te tai ae na roko. E a tia n taekinna Unimwaane Marion D. Hanks (1921–2011), “Eng, ni kabane aika nakon te tembora bwa a na mare a ataia bwa e karaoaki te mwakuri man te kariaiakaki mairoun te Atua ibukin te tai aei ao ae akea tokina. Ma ae kamimi riki karaoan te mwakuri n te bao ni karea n te



Unimwaane
David J.
Thomson

tembora e kantaninga ae mwaiti riki nakon aei. Nakoraoin te reitaki are e karaoaki bon te kabanea ni kakawaki. Berita aika tikiraoi a kabaeaki iroun te mwaane ao te aine n te mare n te tembora, ao kinakin kakabwaia aika a tia ni beritanaki e kaineti nakon ti otaia ao kawakinan taekan te kabaeiae ake a karoia ma te Uea.” (*Maungatabu ni Kabuta, Okitobwa* 1984)

Ngaia ae, ti kanga ni karoa ara mare n te tembora e ibuobuoki ni uota mwaakan berita

aika tabu aikanne ni uaana inanon maiura. Taanga aika a kawakin aia berita aika tabu n te tembora aki ti bootaki ni karikirakea maiua n te aonaaba ma a na katea maiu ae akea tokina. A na uaia n tataro, a na uaia ni kamatebwai booki aika tabu, a na uaia ni kaea te taromauri ao n nakon te tembora, a na uaia ni kabwakai aia kabwianibwai, reireinia aia ataei taekan te euangkerio, ao ni uaia n nakonako kanga rao nakon te karietataaki. Te ka 25 ni mwakoro n te Doctrine ao Covenants iai inanona reirei

aika kakawaki ibukiia mwaane ao aine aika mwanganaga n te mwananga aei. N te kaotioti nakon Emma Smith, e kabwarabwara te Uea tabena bwa te “tia karaunano nakon au toro, Joseph Smith, Jun., kainabam, ni karawawatakina, ma taeka n akoi, n tamnein te nimamannei.” E reireinaki naba bwa e na, “Kariaia tamnein [neienne] bwa e na kimwareirei iroun [kainabana].” N aron anne te mwakoro naba anne e kakoaua nakon neienne bwa e na “boutoka [kainabana]”. Te mare bon te bwai ae tangira te mwakuri korakora ao te bwai ae na reke mairouia rao aikanne tiaki ti n te bwai ae a tataneiai ni karoia ma te katauraoi naba ae korakora ibukin te katiteuanaki n akea tokina.

Ana kouru Aonon te Betebeke e raonaki ma kabanean iango nakon kakorakoraan te utu, man karikirakean mwaitia kairake aika a na kabaeaki



ma buia n te tembora. Te kouru aei e kina kainnoara bwa ti na karoko irouia ao ni kaoia naake a tuai karekei kakabwaia n te kabaeaki ni katauraoia ao ni karekei. Ti a tia n riki bwa taanga ngaira aika ti tamaroa ao utu aika tikiraoi ni kamaiuaki irouia raoraoia ao taan kairiiri, ao ni boutokaaki ngkai a katauraoi ibukin kakabwaia n te entaumente n te tembora ao berita aika tabu n te mare n te tembora. N aron naba aei ti kina kakawakin reireinakia kairake n aomata bwa a na akea te bwai ae a na tangiria Irarikin te mare n te tembora. Ara burabeti ae tangiraki, Beretitenti Thomas S Monsoon e a tia n reireinia kairake n aomata, n taekinna bwa “Akea te bwai ae kakawaki riki nakon mareaakin te aomata ae eti, n te tai ae eti, n te tabo ae eti, man te kariaiakaki ae eti, ao te kariaiakaki anne ao iai naba te mwaaka ni kabaeiae n ana auti te Atua, ana tembora te Atua.” (*Quoted in Teaching of Thomas S Monson, Deseret Book [2011]* p. 114.) Te aeka ni kariaia anne e kaineti nakon natin Tamara are i Karawa ni kabane. N taabo ni kareke rongorongo ao n tamnei n tangira ti aki toki n ongo taeka n aron, “N na tangiriko n aki toki” ngke ni koauana, n akea te kona ni karekei berita aika tabu n te tembora, taeka aikanne akea uaia aika reitinako ke te kabaeaki. Tii rinanon te ongotaeka nakon berita n te tembora aika tabu e na kona iai am tangira n te are ni kakorakoraaki ao ni bitaki nakon te tangira, karinerine, te teimatoa ao te nano ae kona ni kamaana riki te aki mamate ao ni karekei te kimwareirei n akea tokina.

Ririki aika nako, te kauntira ae karineaki n te beretitentii NZ Tembora e anga te reirei nakoia kaain te nakoanibonga n te bootaki ibukiia taan ni mwakuri n otenanti n te tembora: “Te kabanea ni bubura ni kaubwai ae ko na aki karekei, I aki tabe bwa mwaitira kaubwaim ae ko a tia ni kaikoa, e na bon tangiran ao karinean ao te nano ae korakora nakon te aine are ko noora matana iaon te bao ni karekei n ana Auti te Uea, ao are ko taekinna bwa ko tangiria ao ni karinea ao te nano ae korakora ibukin te tai aei ao ni kabane n te tai ae akea tokina. Ngkana ko roko n te kabanea n rietata ni mimitong n te abanuean ae te tiretio, ko aki nako

ikekei n ti ngkoe. Ko na nako ikekei n nakonako n taubai ma am tangira.” (*Taeka aika onoti n te rongorongo iroun Herman Berends*)

Kainabau, Sue ao ngai ti mare n 1983. N te tai anne i New Zealand e riai bwa ko na mare moa itinanikun te tembora ma tuan te aba. Ti karaoa ara “mare n te umwantabu” i Christchurch ao imwiina ti mwananga nakon te Hamilton NZ Tembora ike ti kabaeaki iai ibukin ngkai ao ibukin akea tokina. Iai tibwangaia utu ni kabane ma kakaewenako; I taku bwa akea ae irekereke nako iai, ma a tia ara berita aika tabu n anganira te korakora ao te mwaaka inanon te ririki ngke ti a tia ni kaikawaia ara ataei aika onoman, ao ni matakau irouia temanna imwiin temanna ni katei oin aia utu aika aanaki iaan berita n te tembora. Akea te bwai ae anganira te kimwareirei ae korakora riki nakon ae ti mena n te tembora ma natira. Mwaakan berita aika akea tokia a katauraoa te mwaaka ni koaua ni buokiia bumwaane ma buaine, kaaro ao ataei, ni karokoia n aia konabwai mai ieta.

I kaoi ngkami n tatabemani ngkami ni katauraoi ibukin, ni karekei ao ni karinea te mare ae akea tokina, ao ni mwakuri ni katoabong ni kateimatoa maiuakinan berita aika tabu aikanne. N taai akekei ngkana e buakanaki n ara kaawa, katabeakira nakon te mare ae akea tokina e karekea te kakoaua ae itiaki ni kakawakin “I atai ana mwakuri te Atua ni kabane bwa ana matoatoa n aki toki,” (Te Minita 3:14). I kaota au kakoaua bwa ana kantaninga te Atua “ni uota te aki mamate ao te maiu ae akea tokina nakoia aomata” (Moses 1:39) e roko n rietan te mare n te berita ae tabu ae akea tokina, ngkana a kabaeaki bumwaane ao buaine man mwaakan te nakoanibonga ae tabu, ae kaokaki ni boong aika kaitira ibukin te kantaninga ae tabu aei. Ngkana te bumwaane ao te buaine a karinea te berita ae tabu aei n te kawai ae a tararuia i bon irouia ao te kawai ae a uaia ni maiuakina ana euangkerio Iesu Kristo, a karekea te kaniwanga ae kaubwai ni kateimatoa kakabwaiakia utu n akea tokina.

Tenibwi te ririki imwiin ara mare n te tembora, ngai ma kainabau ti teimatoa n aki bwarannano, ma ti uaia ni karekei ni kabane! ■

A Kona Utu N Ikotaki n Akea Tokina

Iroun Tania Torea

Ngkana ko nakonako inanon mweengan ana utu Rangi ko atiai bwa aei te utu ae tangira ana euangkerio Iesu Kristo. Tamnein te Tia Kamaiiu, taan kairiiri n te Ekaretia, tembora, ao taetae man te euangkerio, a katamaroa oon nanon te tabo n tataninga. Iai naba nnen aran te mitinare ni karineaki iaon te oo. E kabwarabwara te Tari Dane Rangi, “Iai mitinare aika rangin n onoti nakoira. Ti titiraki ibukin araia bwa ti aonga n ururingia. Bon ngaiia mwakoron ara utu ngkai.”

Dane ao kainnabana Kelly a tia n riki bwa kaain Ana Ekaretia Iesu Kristo ibukiia Aika Itiaki ni Boong Aika Kaitira inanon nimaua te ririki, ao a riki bwa kaain te Paraparaumu Uoote, i Porirua Titeiki. E moan ni kaitibo ma mitinare Dane ngke te kairake n ataeinimwaane. E taekinna, “A na kawara tibu te unimwaane, ao ngkana a roko ao I namakina te bwai ae tamaroa. E rangin n tikiraoi ao I aki kona ni mwaninga taekaia. Ngaia ngke a riki natiu, ao I aki toki ni kauringia bwa a na akoia Mitinare.”

Kelly e kaei aaro aika kakaooro n taai aika nako. E taku, “I aki kona n namakina te bwai ae eti,” ni karokoa a roko mitinare n te mataroa. E ngae ngke akea nanoia Dane & Kelly n

reiakina taekan ana onimaki te LDS n te tai anne, a kariaia natiai bwa a na iriia mitinare nakon te taromauri.

E uringa ana taeka kainnabana Kelly ngke e tabeaianga irouia natiai bwa n te taina ao a na aki nakon te taromauri ibukina bwa aki taromauri ana karo. E taku nakon neienne, “Ti kainnanoia ni kairiiri man te katoto.” A moanna n ira te taromauri ma mitinare ao a bwabetitoaki n te tai ae waekoa.

E taku Kelly, “Dane ao Ngai ti roko man te maiu ae mangongao, ao ara moan n ririki n te ekaretia bon taai aika kanganga.” E un Dane iroun temanna ao e kitana te ekaretia, ao n tangiria ni boutoka kainnabana Kelly man n iria, ma e tangiria n tainako n oki.

N 2012, raoraon Dane e tarebon n tuangnga ae e nang bwabetitoaki ao e taku, “I tangiriko bwa ko na mena ikekei.” Ngaia ae Dane e kaea te bwabetito. E uringa, “Te Tamnei e kakoaua nakoio bwa e maiu te burabeti, abotoro, tembora ao n tia ni kabaeaki ibukin ngkai ao akea tokina. I katorobubua ao n tang. I kabwarabure nakon te Tama are i Karawa.”

Te utu ae Rangi a uaia ni manga moanna n ira te taromauri, ao a katea aia kouru bwa a na nakon te tembora bwa a



Te Rinan mai Buki: Brother Dane Rangi, Tamika, Ngakeisha, Sister Kelly Rangi; Terinan mai Imoa: Taneisha, Te Ahu, and Marama.

na kabaaki ma aia utu.

E korakora nanon Kelly ni kan nakon te tembora, ma e kekeiaki n tokanikai iaon ma-maarana. E taku, “I namakina te babakanikawai, n aron ae kanga I tauia au utu, ma I maaku n taekin [kabwakau]. Ngkanne te tairiki teuana I tatato ao ni karekea te kaeka. Mai ika-nne are I a ota iai. Ara Uea

ao ara Tia Kamaiu e korakai i Ketetemane. E atai ao e ota ni bwaai ni kabane aika ti rinano i te aonaaba aei. Te tai anne are I a kaotii Nakoina, ao ni kariaia ni kanakoa te maaku.”

Mwakoron ana kouru te utu ae Rangi n nakoia nakon te tembora n raonaki ma te babaire ni kaiko. E ngare Kelly ngke e kaotia, “Bon akea ara

karinimwane.” Ma e noria te utu aei bwa te tai ae kakawaki. A korea aia kataumwane ibukin bwaai ni kabane aika a kainnanoi ibukin te mwanga, a moanna ni kawakina aia mwane ni katoa wiiki ao e kakabwaiaki Dane bwa e a reke ana mwakuri.

E taekinna Dane bwa teuana te kabanea ni bubura ni

kakabwaia bon te tangira ao aia boutoka kaain te uuote. "A norira n rinanon katakira ao a kawara mweengara n anganira tabeua te taaraa ikai, tabeua te taaraa ikekei, ni buoka aron mwanangara. Ti rangin ni kakaitau."

Tamyka ae 15 ana ririki e nora aron kainnanoan te katauraoi n onoti. E taku, "I namakinna bwa I tangiria ni wareki booki aika tabu ni katauraoai n nakon te tembora. Ngke I karaoia, e mona ni bebete karaoan te bwai ae tangiria Tamau are i Karawa bwa N na karaoia."

N Nobembwa 2013, Dane ao Kelly Rangi ao natia aika niman a karekei otenanti ni kabaebe n te tembora i Hamilton, New Zealand. E kabebetea ni kabwarabwara ana atatai bwa e "tikiraoi."

E ingainga nanon Tamyka n nakon te tembora teuana riki te tai ma ana utu. "Ti a mwakuria nakora nakon te tembora ni karaoa te bwabetito. I rangin n tangiria n nako ni karaoa te mwakuri ibukin au Nana. I rangin ni kaan, rangin ni kaan nakoina."

Nakoia naake a rangin in kekeiaki ni karaoa te mwana-nga nakon te tembora, te Tari ao Titita Rangi anga taeka ni kaunganano aikai, "Onimaki iroun te Tia Kamaiu. E a tia ni karaoa te kawai ibukira ni karaoa te mwananga. Ti teimatoa ao n taua te kai te biti. Kekeiaki ni ua te toki, ao kukurei n te mwananga." ■

N Riki Bwa Utu Aika Akea Tokiia

Iroun Kent Johnston

Ni katoa ririki n Okitobwa, utu man te Christchurch Titeiki a mwananga nako Hamilton ibukin aia mwananga ni katoa ririki nakon te tembora. N 2013, niman taanga man te Riccarton Uoote n Christchurch a kabaeaki n tain aia mwananga nakon te tembora n te wiiki, n raonaki ma teniua te utu ma ataei.

Ni kabane taanga iai mwana-ngaia ae onoti nakon te tembora, n raonaki ma kakabwaia ao kakaewenako aika mwaiti. Ni kabane bon te kakoaua n nanoia n iri n te mare ae koaua ao berita aika tabu aika akea tokiia.

Te kakawari ni kamaiu bon te kawai n oki ibukin teuana te taanga are e a tia n aki kakaoni-maki inanon ririki aika mwaiti. Te taanga teuana ae a tia ni mare inanon ririki aika mwaiti a katea aia kouru n te ririki ae nako bwa a na nakon te tembora. Rinanon aia boutoka ao aia tangira taan kairiiri n te uuote ao membwa, a buokaki ni kakoroi nanon aia kouru n tia ni kabaeaki n ana Auti te Uea. E a tia te tamnei ao te kimwareirei ae korakora ni mena irouwia utu n tatabemania nako man moan rikin te bwai ae tamaroa aei.

Te Bitobi n te Riccarton Uoote, Kent Johnston, e kabwarabwara mwiin te katauraoi nakon te tembora ao te kabaebe bwa kanga te bitaki ae kamimi ibukiia taanga ao utu. "A tia ni

karekeia te kimwareirei ae korakora inanon mweengaia ao n tamneia imwiin kakorakorakin aia onimaki iroun Iesu Kristo. A kokoauai kakabwaia man te maiu ae raoiroi" e taku.

Te katauraoi ibukin te kabaebe n te tembora tiaki n ae a na akea te kanganga iai. Uoman taanga a kekeiaki inanon tabeua ririki ma te kantaninga bwa a na nakon te tembora, ma a tarai a ma te kakaitau bwa e kanga te tembora ni kakabwaiai maiuia. A tei bwa taan kakoauaa mwakan te kabaebe ni berita aika tabu ae a tia ni katokai iaoia.

A tia ni kabane ni kaan riki nakon Kristo rinanon aia onimaki, boutokan te utu, taan kairiiri n te uuote ao te titeiki, ao membwa n te uuote aika tangiraki.

Temanna te membwa e kabwarabwara ana atatai ni kangai "Aki korobukin taeka bwa e na kamatata taonakon te tangira ae namakinaki n te bong anne n ana Auti te Uea. Aki konaki n tautauaki rannimata, te tangira e korakora ao tamnein te Uea e oti irouwia naake a iri."

Bitiobi Johnston e kabwarabwara ana namakin n te kawai aei. "Ti namakina ae raoiroi riki n te uuote ibukin kareke-ai taari ao titita aikai i nukan kawaira, ao ara kakaitau bukina bwa e a tia te euangkerio ni kakorakoraki inanora. Ti kantaninga riki kaokan te tangira ae

takaburinako aei ma bumwaane ao buaine aika mwaiti ni kabaeaki ma aia ataei n Okitobwa ae imwaira, ngkana ti kakauongo nakon aia taeka n reirei ara tia kairiiri ao ni uaia n ikarekebai n te mwakuri n tangira ae tamaroa aei."

E a tia Bitiobi Johnston n namakina mwaakan berita n te tembora n oin maiuna. E taku, "E a tia maiu ni kakabwaiaki n ae korakora man aia kabaebae

ma berita aika tabu tinau ma tamau, are e riki imwiin okiia natiu mwaane nakon bootaki ni kakukurei n te kawai ae rangin ni kamimi imwiin 10 te ririki n aki kakaonimaki. N te tai anne ao e tuai n reke au iango ibukin te euangkerio, e ngae n anne ao te Uea e kamaiuai, I aki kona ni kakea bonganana, ao e a tia te bwai anne ni bita maiu n aki toki."

E ngae ngke taman Bitiobi

Johnston e a tia ni mate, mwiin te mwakuri ae raoiroi are e katikui, ao ana onimaki kainabana n aia berita n te mare, e a tia ni katauraoa te rabuna ni kamanomano are e a kona iai te utu ni borauakina te maiu aei ao n riki bwa te kabanea n tamaroa ae a kona ni karaoia. Aio e kaungaia n te utu ngkana a rikirake ao ni bane ni mwaakuri ao ni katauraoi ibukin akea tokina. ■

*Te Riccarton
Uoote i
Christchurch e a
tia ni kakorako-
raki ma niman
taanga aika a
tia ni kabaeaki
n tain aia mwa-
nanga nakon te
tembora.*



Kamaiuan Temanna

Iroun Djahni W. (ana ririki 13 te ririki)

Onoua te wiiki n nako, I nako ni moan au kakawari ni kamaiu n akea tinau. Te tairiki anne are I kaitibo iai ma raoraou ae Faith. I maaku n nako, I raraoma bwa rimwi I taekina te bwai ae bure, ma I ataia bwa te Nakoanibonga n au uoote e a tia n tataro ao n aki mamamat ibukin te mweenga aei bwa ti na kawaria. I ti kainnanoa te onimaki ao ngaia anne ae I tataro ibukina—*onimaki*.

Ti karebwerebwe iaon te mataroa. Ti titiraki ibukin te ara are ti a tia n anganaki. Te aine are e kaeka n te mataroa e taku bwa e aki maeka te aomata anne ikanne. I nanokawaki n te tai ae uarereke, ma ngkanne e taku “Bon natiu te aine, aio ana aetureti.” Ti kabwarabwara bwa bukin tera ngkai ti roko ni kawaria. I taku “Beretitenti Monson e a tia n tuangira bwa ti na nako ni kamaiu, n tuangia membwa ni kabane bwa e tangiria ao e mitiniia te Tama are i Karawa. Ti tangiri ngkami ao ti mitini ngkami naba.”

E moanna n tang ao e taku bwa e na tataro ibukin te reke mairoun te Tama are i Karawa ai tibwa n te bong ae nako, ao ti riki bwa te kaeka nakon ana tataro. E tuangira arana bwa Faith, ao boni ngaia te membwa ae I aki kakaonimaki naba, ao e tuangira bwa ti na rin. Faith e anenea te anene man te moanrinan nakoira, ao ti tataro ma ngaia. Imwain ae ti nako I kaoa bwa e na roko n taromauri n te Tabati, ao e taku bwa e na roko. Ngke ti oki rikaaki nakon te ka I tataro ni wirikiriki ao ni kaitaua te Tama are i Karawa ibukin anganakiu te *onimaki* ae I kainnanoia bwa n na nakon te kamaiu.

I rangin ni mimi. Ngke ti oki nakon te umwatabu ao ni kabane toaia a bane n anga aia ribooti, te titita are I nako ma ngaia e tuangai bwa n na anga ara ribooti n te tairiki anne. E bon nako nanou, ma I uringnga bwa iai au *onimaki*. I tuangiia ni kabane ake a roko ikekei n te tairiki anne ngkana a kona n tataro ibukin raoraou ae

boou Faith, bwa e na roko nakon te Taromauri n te Tabati. Ngke I oki nakon mweengau I tuaingia kaain au utu ngkana ti kona n tataro ibukina naba.

N te Tabati I tekateka ao n tataninga. I aki noria n taabo ni kabane ao n na riai ni katauraoa te katangitang ibukin te bootaki n Toa. E moanna n tang te biano ao I aki kona n noria. I kabaraka atu ao n tataro teutana riki. Ngke I orotai n te moan n anene, I nora raoraou ae boou Faith bwa e a roko, ao n tekateka mai ibuki. I rangin ni kakaitau n noria.

I biri nakoia au utu ni kuri n tang imwiin naba te Toa, “Ae mena ikai, ae mena ikai!” I tuangia bwa a na kakoaua bwa a na kabwarabwaraia, ao ni kairia nakon te kiraati.

Te Tabati are imwiina e a manga roko naba, I rangin ni kukurei n nooria.

E a manga roko riki te Katenibong, ao bon tai-rikin riki te kamaiu. N te tairiki anne Faith e raona tinau ao Ngai, ngke ti nako ni kamaiuia aomata tabeman.

Ngkanne I nakon ana tabo ni kaembwa te reirei ae aranaki bwa Te Putere. Akea te ran ae tii ke te iti. Ti kabonganana te tianaraita ao ni uaati inanon te karaanga. E reke au tai ae tamaroa.

Katenibongin ara kaembwa ngke I wene iaon au kainiwene I uringa bwa ara tairiki ni kamaiu n te uoote. I iangoia bwa e kanga aron te kakawari, ao ngkana iai temanna ae e wetea Faith, ao ni kaoa bwa e na nakon te kamaiu ma ngaia.

N te tai ae wakoa, ao iai te bwai ae kibara matau. Bon te bwebwe. Ngke I tararake n tara te ota e otamwaka otan te taura ae tinetine ikekei, I noori bubua ni manibwebwe aika a kaona te tiiring. Ngke I tara tinaniku, te winto ao te mataroa a kaonaki ma ngaa manibwebwe.

I iangoa taekan te kakawari ni kamaiu, ao ni kabotaua te taura ae bane otana ma otan Kristo, ao te euangkerio. I iangoi manibwebwe iaon te tiiring kanga ti tebo ma membwa n te euangkerio aika kakaonimaki, ni karaoa aia kabanea ni kona ni mena irarikin te taura. Au



Djahni ao Faith a mena n te Whakatane Uoote, Tauranga Titeiki.

kantaninga bwa raoraou Faith ngaia temanna te manibwebwe.

E roko irou te nanokawaki ngke I tarai ni kbane manibwebwe ake itinanikun te kateitei ake

aki kona n roko n te oota. I iangoa te winto ao te mataroa are e tukiia n rin kanga ti tebo ma ana mwakuri Tatan nakoia membwa aika aika kakaonimaki ao aika tiaki membwa.

Imwiin ara tataro n te kurubu tabeman a teirake n nako. Temanna te teteei ni mwaane e kaukanako te mataroa ao ngaa manibwebwe ake a mena itinaniku a bane ni kiba ni kakioa te oota. I ngare ao n iangoia bwa ngke arona bwa e ukinako te mataroa e tei ibukiia membwa n au uoote, aika a kakaonimaki n nanakon te kamaiu ni katoa tairikin te Karenibong, ni kaoia tabeman bwa a na urua te kabaebae are e kabaeia tarira ao mwaanera aika bua nakon te kakaitara. Manibwebwe aika kiba nakon te oota a tei ibukiia membwa aika aki batni kakaonimaki n oki nakon te euangkerio, ao aika tiaki membwa ni bwabetitoaki.

I namakina te raunano iroun te tamnei, I ata raoraou Faith bon akea ana kanganga ao I rangin ni kakaitau.

Ngke I wene ikekei n te kaembwa n te tairiki anne, e karauaki nanou man au anene ae maten nanou—E kakukurei nakon nanon te Tia Kawakin Tiibu ae Tangiraki.

*. . . E kukurei nanon te Tia kawakin tiibu,
A kukurei ruangaun ma ruaman,
A kukurei tiibu ake a uamaenako, inanon te
rereua nakon kaai aika kiriin.
Ongora! E wewete, bubuti ma te tangira n te
bong aei;
“Ko na aki ukoukora au tibu ae bua, n otinako
man au tabo ni katantan, ni bua?”
A kiriin kaai kanaia maan a kaoia, A karewe-
reue raan ao a teimatoa.
Te Uea, ti na kaeka ma te kukurei, “Eng, e kaka-
bwaiaki te Mwatita, ti na karaoia!”
Karaoi ara tia kawakin tibu aika koaua, anga-
nira te tangira ae korakora.
Kanakoira nakon te rereua, ni ukoukoria tiibu
aika bua. . . .
Naako nakon te Kamaiu ti na kawaekoa, Uotia
rikaaki nakon n neia. ■*